


李太白集



李  
次緒紀元夏月湖  
北崇文書局開  
集

李翰林集三十卷常山宋次道編類而南豐曾氏所  
攷次者也歲久譌缺俗本雜出增損互異無所是正  
余嘗病之癸巳秋得崑山徐氏所藏臨川晏處善本  
重加校正梓之家塾其與俗本不同者別爲攷異一  
卷庶使讀是編者不失古人之舊而余亦得以廣其  
傳焉康熙五十六年五月吳門繆曰芑題於城西之  
雙泉草堂

李太白全集總目

原目錄一卷

原序墓誌碑碣一卷

歌詩二十三卷

古賦一卷

表書一卷


序一卷

讚一卷

頌銘記一卷


碑文一卷

後序三首



附考異一卷 嗣出

總目



李太白文集目錄

第一卷

草堂集序

李翰林集序

李翰林別集序

翰林學士李君墓誌

翰林學士李君碣記

翰林學士李公新墓碑

翰林學士李公墓碑

第二卷

歌詩五十九首

第三卷

歌詩三十一首 樂府一

遠別離

公無渡河

蜀道難

梁甫吟

烏夜啼

烏棲曲

戰城南

將進酒

行行且遊獵篇

飛龍引

天馬歌

行路難 三首

長相思

土留田

春日行

前有樽酒行 二首

夜坐吟

野田黃雀行

箜篌謠

雉朝飛

上雲樂

夷則格上白鳩拂舞詞

日出入行

胡無人

北風行

俠客行

關山月

第四卷

歌詩四十首

樂府上

獨漉篇

登高丘而望遠海

陽春歌

陽叛兒

雙鷺離

山人勸酒

于闐採花

鞠歌行

幽澗泉

王昭君 二首

中山孺子妾歌

荊州歌

設辟邪伎鼓吹雉子班曲辭

相逢行

久別離

古有所思

採蓮曲

白頭吟

臨江王節士歌

司馬將軍歌

君道曲

結襪子

結客少年場行

長干行

古朗月行

上之回

獨不見

白紵辭

鳴鴈行

妾薄命

幽州胡馬客歌

門有車馬客行

君子有所思行

東海有勇婦

黃葛篇

第五卷

歌詩五十六首 樂府三

白馬篇

鳳笙篇

怨歌行

塞下曲 六首

來日大難

塞上曲

玉階怨

襄陽曲

大堤曲

宮中行樂詞

清平調詞

鼓吹入朝曲

秦女休行

秦女卷衣

東武吟

邯鄲才人嫁為廝養卒婦

出自薊北門行 洛陽陌

北上行 短歌行

空城雀 發白馬

陌上桑 枯魚過河泣

丁都護歌 相逢行

千里思 樹中草

君馬黃 擬古

折楊柳 鳳凰曲

少年子 紫騮馬

少年行 白鼻騮

豫章行 沐浴子

第六卷

樂府四

高句驪

靜夜思

淶水曲

鳳臺曲

猛虎行

從軍行

秋思

春思

秋思

子夜吳歌春夏  
秋冬

春

夏

秋

冬

對酒

估客樂

少年行

擣衣篇

去婦詞

長相思

南都行

侍從宜春苑奉詔賦歌

玉壺吟

悲歌行

雲臺歌

豪士歌

白毫子歌

長歌行

襄陽歌歌吟上

江上吟

笑歌行

幽歌行

元丹丘歌

燭照山水壁畫歌

第七卷

歌詩六十八首歌吟下

梁園吟

鳴臯歌錢從翁清

白雲歌

勞勞亭歌

西樓月下吟

秋浦歌

求王東巡歌

峨眉山人月歌

赤壁歌

懷仙歌

清溪行

鳴臯歌

僧伽歌

金陵歌

橫江詞

東山吟

粉圖山水歌

上皇西巡南京歌

峨眉山人月歌送蜀僧

江夏行

玉真仙人詞

五雲裘歌

臨路歌

壯士勤將軍名思齊歌

草書歌行

古意

山鷓鴣詞

和通塘曲

第八卷

歌詩四十一首 贈一

贈孟浩然

贈從兄皓

贈張公

淮海對雪

贈徐安宜

贈任城簿

早秋贈裴十七

贈范金鄉

贈王少府

東魯見狄博通

見京兆韋參軍

贈周處士

玉真公主別館苦雨

贈韋祕書

贈韋侍御

贈薛校書

贈何七判官

讀諸葛武侯傳書懷

贈郭將軍

駕去溫泉宮後贈楊山人

溫泉侍從歸逢故人

贈裴十四

贈崔侍御

上李邕

述德兼陳情

雪讒贈友人四言

贈參寥子

贈張司戶

贈清漳明府姪

贈臨洛縣令

贈郭季鷹

贈王大勸入山幽居

贈王司士

贈盧徵君

贈新平少年  
贈獨孤駙馬

贈崔侍御

第九卷

歌詩三十四首 贈三

贈焦鍊師

贈陽徵君

秋日鑷白髮贈元六兄

書情贈蔡舍人

憶舊遊贈馬少府

對雪獻從兄

訪道安陵遇蓋寰

雜言用投丹陽知己

贈崔郎中

贈崔諮議

贈昇州王使君

贈別從甥高五

贈裴司馬

叙舊贈江陽宰

贈從孫義興宰

草創大還

贈崔司戶

贈宋少府

戲贈鄭溧陽

贈僧崖公

遊溧陽北湖亭望瓦屋山 一作贈孟浩然

醉後贈高鎮

贈柳少府

贈崔秋浦 三首

望九華山贈韋青陽

贈柳園

聞謝楊兒吟猛虎詞

宿清溪主人

贈王判官

在水軍宴贈幕府諸侍御

贈潘侍御論錢少陽

贈武十七諤 并序

第十卷

歌詩二十九首 贈三

贈張相

贈閻立宿松

獄中上崔相

繫尋陽上崔相

中丞宋公脫余之囚參謀幕府

流夜郎贈辛判官

贈劉都使

贈常侍御

贈易秀才

流夜郎贈韋太守

席上贈史郎中

流夜郎半道承恩放還

贈賈舍人

博平鄭太守之武陵立馬贈別

江上贈竇長史

贈王漢陽

贈輔錄事

贈韋南陵

贈別舍人弟之江南

贈盧司戶

贈從弟南平太守

醉後贈王歷陽

贈歷陽褚司馬

對雪醉後贈王歷陽

第十一卷

歌詩三十二首 贈四

贈宣城宇文太守

贈宣城趙太守

贈從弟宣州長史

書懷贈常贊府

於五松山贈常贊府

自梁園至敬亭山

贈友人

陳情贈友人

贈從弟

贈閭丘處士

贈錢徵君

贈靈源寺冲濬公

贈僧朝美

贈僧行融

贈胡公求白鵬

登敬亭山懷古

贈汪倫

避地剡中贈崔宣城

獻從叔當塗宰

寄上

桃花巖寄劉侍御

淮南卧病書懷

寄弄月溪吳山人

秋山

望終南山

夕霽杜陵登樓

秋夜宿龍門香山寺

第十二卷

春日獨坐

寄淮南友人

沙丘城下寄杜甫

聞丹丘子營石門幽居

歌詩四十首 寄下

淮陰書懷

聞王昌齡左遷

寄王屋山人

憶舊遊

月夜江行

宿白鷺洲

新林浦阻風

寄韋南陵

題情深樹

北山獨酌

寄當塗趙少府

寄東魯二稚子

獨酌青溪江石上

禪房懷友人

廬山謠

下尋陽城汎彭蠡

書情寄從弟昭

寄上吳王

寄王漢陽

春日歸山

流夜郎永華寺

流夜郎至西塞驛

自漢陽病酒

望漢陽柳色

江夏寄輔錄事

早春寄王漢陽

江上寄巴東故人

江上寄元林宗

寄從弟

涇溪東亭

宣城九日聞崔侍御遊敬亭

寄崔侍御

涇溪南藍山下有落星潭可以卜築

早過漆林渡

遊敬亭寄崔侍御

三山望金陵

自金陵泝流過白壁山翫月

第十三卷

歌詩三十六首

別

宴別杜補闕范侍御

留別魯頌

別中都明府兄

夢遊天姥

留別曹南羣官

留別于逖裴十三

留別王司馬

留別金門知己

夜別張五

別蘇少府

留別劉少府

別元丹丘之淮陽

留別廣陵諸公 廣陵贈別

感時留別從兄從弟 別儲邕之剡中

留別金陵諸公 口號

金陵酒肆留別 白下亭留別

別東林寺僧 竈夜郎烏江留別

留別龔處士 贈別鄭判官

黃鶴樓送孟浩然

遊衡岳過漢陽雙松亭留別

別宋之悌 留別賈舍人

渡荆門送別 留別金陵崔侍御

別韋少府 別兒童入京

五松山別荀七 別山僧

贈別王山人

第十四卷

歌詩三十五首

送上

南陽送客 送張舍人之江東

送王屋山人 金陵訓翰林謫仙子附

送當塗趙少府 送友人尋越中山水

送族弟之滁 送友人遊梅湖

送崔十二遊天竺寺 送揚山人歸天台

送溫處士歸黃山 送方士趙叟之東平

送韓準裴政孔巢父還山

送楊少府赴選 對雪奉餞任城六父

送吳五之瑯琊 送竇明府還西京

送韋八之西京 送薛九被讒去魯

送族弟况之秦 送族弟凝

送張子還嵩陽 送魯郡劉長史

送族弟單父主簿 送杜二甫

送張十四遊河北 送裴大澤

灞陵行送別 送賀監歸四明應制

送竇司馬貶宜春 送羽林陶將軍

送程劉二侍御兼獨孤判官

送姪良携二妓赴會稽

送賀賓客歸越 送張遙之壽陽幕府

第十五卷

歌詩四十八首

送中

送裴十八歸嵩山 送族弟歸桂陽

送鄭灌從軍 送于十八應四子舉落第

送別 送族弟從軍

送梁公昌從信安王北征

送白利從金吾董將軍西征

送張秀才從軍 送崔度還吳

送祝八之江東

送侯十一

送二從弟赴舉

奉餞高尊師

送張十一遊東吳

送紀秀才遊越

送長沙陳太守

送楊燕之東魯

送蔡山人

送蕭三十一之魯中

送楊山人歸嵩山

送殷淑 三首

送岑徵君歸鳴皋山

送范山人歸太山

送韓侍御之廣德令

白雲歌送友人

送通禪師還隱靜寺

送友人

送別

江上送女道士遊南岳

送友人入蜀

送趙雲卿

送李青歸華陽川

送別 送舍弟

送麴十少府

送張秀才

尋陽送弟

餞校書叔雲

送王孝廉覲省

送杜秀芝舉入京

第十六卷

歌詩三十八首

送下

醉後送呂使君

送陳郎歸衡陽

送倩公歸漢東

送趙判官

送陸判官往琵琶峽

送梁四歸東平

江夏送友人

送郗昂謫巴中

江夏送中丞

送宋少府入三峽

送二季之江東

送友人之羅浮

謝朓樓餞別

送劉副使入秦

涇川送族弟錡

五松山送殷淑

送崔氏昆季之金陵

登陵敲臺送族弟

送儲邕之武昌

訓答上

訓談少府

訓贈桃竹書筒

東魯行荅汶上翁

早秋南樓訓賈公衡

山中荅俗人

荅友人贈烏紗帽

訓張司馬贈墨

荅迦葉司馬問白是何人

荅崔少府遊終南翠微寺

贈李十二左司郎中崔宗之

訓崔五郎中

以詩代書荅元丹丘

金門荅蘇秀才

訓王司馬閣正字對雪

訓贈斗酒雙魚

訓張卿南陵見贈

訓岑勛以詩見招

荅從弟過西園

訓王補闕

第十七卷

歌詩三十首

訓荅下

荅王十二寒夜獨酌有懷

訓裴侍御對雨感時 贈李十二附

訓崔侍御 翫月金陵城西孫楚酒樓

江上荅崔宣城 荅族姪贈玉泉仙人掌茶

訓裴侍御留袖師彈琴

張相公出鎮荊州 醉後荅丁十八

荅裴侍御期月滿汎洞庭

荅高山人 荅杜秀才

訓韓侍御見招隱黃山

訓崔十五見招

遊宴上

遊南陽白水 遊南陽清冷泉

尋魯城北范居士失道

魯東門汎舟 秋獵孟諸夜歸東樓觀妓

遊太山 秋夜汎宴喜亭池

携妓登梁王棲霞山 觀魚潭

第十八卷

歌詩四十首

遊宴下

與從姪遊天竺寺 同友人遊台越

下終南山 朝下過盧郎中

侍從遊宿溫泉 南亭觀妓

春遊羅敷潭 春陪裴使君遊石娥溪

陪從祖汎鵲山湖 春日陪諸官宴北湖

宴鄭叅卿山池 遊謝氏山亭

把酒問月 同族姪遊昌禪師山池

金陵鳳凰臺置酒 秋浦雲夜對酒

與周剛玉鏡潭宴別 遊秋浦白筍陂

宴陶家亭子 韋司馬樓舫觀妓

流夜郎至江夏宴興德寺南閣

汎沔州城南郎官湖 陪侍郎叔遊洞庭醉後

夜汎洞庭尋裴侍御清酌

陪族叔及賈舍人遊洞庭

宴楊執戟冶樓 銅官山醉後絕句

遊五松山 宣城青溪

遊涇川陵巖寺 遊水西

九日登山 九日

九日龍山飲 九月十日即事

陪族叔遊化城寺

第十九卷

歌詩三十六首

登覽

登錦城散花樓 登峨眉山

大庭庫 登單父半月臺

天台曉望 早望海霞邊

焦山香望松寥山 杜陵絕句

登太白峯 登邯鄲洪波臺

登廣武古戰場 登新平樓

謁老君廟 秋日登揚州西靈塔

登金陵冶城西北謝安墩

登瓦官閣 登梅崗望金陵

登金陵鳳皇臺 望廬山瀑布

望廬山五老峯 江上望皖公山

望黃鶴山 鸚鵡洲

九日登巴陵置酒望洞庭水軍

秋登巴陵望洞庭 登岳陽樓

登開元寺西閣 與賈舍人龍興寺望澗湖

挂席江上待月有懷 金陵望漢江

秋登宣城謝朓北樓 望天門山

望木瓜山 登敬亭北二小山

過崔八丈水亭

第二十卷

歌詩六十一首

行役

安州應城玉女湯作 之廣陵宿常二南部幽居

夜下征虜亭 下途歸石門

客中作 太原早秋

奔亡道中

郢門秋懷

至鴨欄驛

荆門浮舟望蜀江

上三峽

自巴東舟行經瞿唐峽

早發白帝城

秋下荆門

江行寄遠

宿五松山下荀媪家

下涇縣陵陽溪至澁灘

下陵陽公高溪三門六刺灘

夜泊黃山聞劬才四矣吟宿鰕湖

懷古

西施

王右軍

上元夫人

蘇臺覽古

越中覽古

商山四皓

過四皓墓

峴山懷古

自廣平至邯鄲登城樓書懷

蘇武

經下邳圯橋懷張子房

月夜金陵懷古

金陵三首

秋夜板橋浦汎月懷謝朓

金陵新亭

過彭蠡湖

入彭蠡經松門觀石鏡懷謝康樂

廬江主人婦

陪宋中丞夜飲懷古

望鸚鵡洲悲禰衡

宿巫山下

金陵白楊十字巷

謝公亭

紀南陵題五松山 夜泊牛渚懷古

姑熟十詠

姑熟谿

丹陽湖

謝公宅

陵敲臺

相公井

慈姥竹

望夫山

牛渚磯

靈墟山

天門山

第二十一卷

歌詩四十七首

閑適

與元丹丘談玄

尋高鳳石門山中元丹丘

般若寺水閣納涼 東樓醉起

醉題屈突明府廳 月下獨酌

春歸終南山松龍舊隱

冬夜醉宿龍門 尋山僧不遇

過汪氏別業 待酒不至

獨酌 友人會宿

春日獨酌 金陵江上遇隱者

月夜聽彈琴 青溪半夜聞笛

山中忽然有懷 夏日山中

山中與幽人對酌 春日醉起

東林寺夜懷 尋雍尊師隱居

聽黃鶴樓上吹笛

對酒

醉題王漢陽廳

嘲王歷陽不肯飲酒

獨坐敬亭山

自遣

訪戴天山道士不遇

秋日與張少府楚城韋公藏書高齋

懷思

秋夜懷故山

憶崔郎中游南陽遺孔子琴

憶東山

望月有懷

對酒憶賀監

重憶一首

春滯沅湘有懷山中 落日憶山中

憶秋浦桃花舊遊

第二十二卷

歌詩四十五首

感遇

越中秋懷

效古

感寓

擬古

感興

寓言

秋夕旅懷

感遇

寫懷

翰林讀書言懷

尋陽紫極宮感秋

江上秋懷

秋夕書懷

避地司空原言懷

南奔書懷

上崔相百憂章

萬憤詞

荊州賊亂臨洞庭言懷

覽鏡書懷

田園言懷

江南春懷

第二十三卷

歌詩五十三首

詠物

聽蜀僧濬彈琴

魯東門觀刈蒲

詠鄰女東認海石榴

南軒松

詠山樽

尋王侍御不遇詠壁上鸚鵡

紫藤樹

觀放白鷹

觀博平王山水粉圖

題崔明府丹竈

觀元丹丘坐巫山屏風

求崔山人瀑布圖

見野草中有名白頭翁者

流夜郎題葵葉

瑩禪師房觀山海圖

白鷺鷥

詠桂二首

白胡桃

巫山枕障

庭前晚開花

宣城長史贈琴雙舞鶴

題詠

題紫陽先生壁

題元丹丘山居

李目  
題元丹丘穎陽山居  
題瓜洲新河

洗脚亭  
勞勞亭

題王處士水亭  
題嵩山元丹丘山居

題江夏脩靜寺  
改九子山為九華山聯句

題宛溪館  
題東谿公幽居

雜詠

嘲魯儒  
懼讒

觀獵  
觀胡人吹笛

軍行  
從軍行

平虜將軍妻  
春夜洛城聞笛

嵩山採菖蒲者  
金陵聽韓侍御吹笛

流夜郎聞酺不預  
放後遇恩不霑

宣城見杜鵑花  
白田馬上聞鶯

暖酒  
三五七言

雜詩

第二十四卷

歌詩六十二首

閨情

寄遠  
長信宮

長門怨  
春怨

代贈遠  
陌上贈美人

閨情  
代別情人

代秋情

對酒

怨情

湖邊採蓮婦

怨情

代寄情人楚詞體

學古思邊

思邊

口號吳王舞人半醉

折荷有贈

代美人愁鏡

贈段七娘

別內赴徵 三首

秋浦寄內

自代內贈

秋浦感主人歸鵲寄內

送內尋廬山女道士 贈內

在潯陽非所寄內 南流夜郎寄內

越女詞

浣沙石上女

示金陵子

出妓金陵子

巴女詞

哀傷

哭晁卿衡

自溧水道哭王炎

哭宣城善釀紀叟

宣城哭蔣徵君華

第二十五卷

古賦

明堂賦

大獵賦

大鵬賦

劍閣賦

擬恨賦

惜餘春賦

愁陽春賦

悲清秋賦

第二十六卷

表

為吳王謝責赴行在遲滯表

為宋中丞請都金陵表

為宋中丞自薦表

書

代壽山蒼孟少府移文書

上安州李長史書

與賈少公書

為趙宣城與楊右相書

與韓荊州朝宗書  
上安州裴長史書

第二十七卷

序

送張祖監丞之東都序

奉餞十七翁二十四翁尋桃花源序

陪司馬武公宴姑熟亭序

江夏送林公上人遊衡嶽序

金陵送權十一序

姑熟亭送趙少府序

敬亭送從姪遊廬山序

送黃鍾之鄱陽序 送蔡十還家雲夢序

餞陽曲王贊 江夏送倩公歸漢東序

餞李副使移軍廣陵序

澤畔吟序 登汝州龍興閣序

送孟贊府兄還都序

春夜宴桃花園序

隨州食霞樓送烟子元隱仙城山序

送戴十五歸衡嶽序

送傅公之江南序 送從弟京兆參軍之淮南

第二十八卷

讚

李宰君畫讚

金陵名僧粉圖慈親讚

李居士讚

安吉崔少府翰畫讚

宣城吳錄事畫讚

壁畫蒼鷹鳥讚

畫師猛讚

將軍畫讚

西方淨土變相讚

楊利物畫讚

畫鸛讚

誌公畫讚

琴讚

朱虛侯讚

觀飲飛斬蛟圖讚

地藏菩薩讚

葉和尚讚

第二十九卷

頌

趙公西候亭頌

佛頂尊勝陀羅尼幢頌

銘

化城寺大鐘銘

天門山銘

記

任城縣廳壁記

第三十卷

碑

比干碑

貞義女碑銘

韋公德政碑

武昌宰去思碑

虞城縣令去思頌碑

文

祭璿和尚文

祭九江文


李太白文集目錄卷終

李太白文集卷第一

草堂集序

宣州當塗縣令李陽冰

李白字太白隴西成紀人涼武昭王暠九世孫蟬聯  
珪組世為顯著中葉非罪謫居條支易姓為名然自  
窮蟬至舜五世為庶累世不大曜亦可歎焉神龍之  
始逃歸于蜀復指李樹而生伯陽驚姜之夕長庚入  
夢故生而名白以太白字之世稱太白之精得之矣  
不讀非聖之書恥為鄭衛之作故其言多似天仙之  
辭凡所著述言多諷興自三代已來風騷之後馳驅  
屈宋鞭撻揚馬千載獨步唯公一人故王公趨風列  
岳結軌羣賢翕習如鳥歸鳳盧黃門云陳拾遺橫制



頽波天下質文翕然一變至今朝詩體尚有梁陳宮掖之風至公大變掃地併盡今古文集過而不行唯公文章橫被六合可謂力敵造化歟天寶中皇祖下詔徵就金馬降輦步迎如見綺皓以七寶牀賜食御手調羹以飯之謂曰卿是布衣名為朕知非素畜道義何以及此置于金鑿殿出入翰林中問以國政潛草詔誥人無知者醜正同列害能成謗格言不入帝用踈之公乃浪跡縱酒以自昏穢詠謔之際屢稱東山又與賀知章崔宗之等自為八仙之遊謂公謫仙人朝列賦謫仙之謔凡數百首多言公之不得意天子知其不可留乃賜金歸之遂就從祖陳留採訪大

使彥允請北海高天師授道錄於齊州紫極宮將東歸蓬萊仍羽人駕丹丘耳陽冰試絃歌於當塗心非所好公遐不棄我扁舟而相歡臨當挂冠公又疾亟草藁萬卷手集未修枕上授簡俾余為序論關雎之義始愧卜商明春秋之辭終慙杜預自中原有事公避地八年當時著述十喪其九今所存者皆得之他人焉時寶應元年十一月乙酉也

李翰林集序

前進士魏顥

自盤古劃天地天地之氣艮于西南劔門上斷橫江下絕岷峨之曲別為錦川蜀之人無聞則已聞則傑出是生相如君平王褒揚雄降有陳子昂李白皆五

百年矣白本隴西乃放形因家於繇身既生蜀則江山英秀伏羲造書契後文章濫觴者六經六經糟粕離騷離騷糠粃建安七子七子至白中有蘭芳情理宛約詞句妍麗白與古人爭長三字九言鬼出神入瞪若乎後耳白久居峨眉與丹丘因持盈法師達白亦因之入翰林各動京師大鵬賦時家藏一本故賓客賀公竒白風骨呼為謫仙子由是朝廷作歌數百篇上皇豫游召白白時為貴門邀飲比至半醉令製出師詔不草而成許中書舍人以張垫讒逐游海岱間年五十餘尚無祿位祿位拘常人橫海鷗負天鵬豈池籠榮之顯始名萬次名炎萬之日不遠命駕江

東訪白游天台還廣陵見之眸子炯然哆如餓虎或時束帶風流蘊藉曾受道籙于齊有青綺冠帔一副少任俠手刃數人與友自荆徂楊路亡權窆迴棹方暑亡友糜潰白收其骨江路而舟又長揖韓荆州荆州延飲白悞拜韓讓之白曰酒以成禮荆州大悅白始娶于許生一女二男曰明月奴女既嫁而卒又合于劉劉訣次合于魯一婦人生子曰頗黎終娶于宋間携昭陽金陵之妓迹類謝康樂世号為李東山駿馬美妾所適二千石郊迎飲數斗醉則奴丹砂撫青海波滿堂不樂白宰酒則樂顯平生自負人或為狂白相見混合有贈之作謂余尔後必著大名於天下

無忘老夫與明月奴因盡出其文命顥為集顥今登第豈符言耶解携明年四海大盜宗室有潭者白陷焉謫居夜郎罪不至此屢經昭洗朝廷忍白久為長沙汨羅之儔路遠不存否極則泰白宜自寬吾觀白之文義有濟代命然千鈞之弩魏王大瓠用之有時議者柰何以白有叔夜之短儻黃祖過禰晉帝罪阮古無其賢所謂仲尼不假蓋於子夏經亂離白章句蕩盡上元末顥於絳偶然得之沉吟累年一字不下今日懷舊援筆成序首以贈顥作顥訓白詩不忘故人也次以大鵬賦古樂府諸篇積薪而錄文有差互者兩舉之白未絕筆吾其再刊付男平津子掌其他

事跡存於後序

李翰林別集序

朝散大夫行尚書職方員外郎直史館上柱國樂史

李翰林歌詩李陽冰纂為草堂集十卷史又別收歌詩十卷與草堂集互有得失因校勘排為二十卷號曰李翰林集今於三館中得李白賦序表讚書頌等亦排為十卷號曰李翰林別集翰林在唐天寶中賀秘監聞於明皇帝召見金鑾殿降步輦迎如見綺皓草和蕃書思若懸河帝嘉之七寶方丈賜食於前御手調羹於是置之金鑾殿出入翰林中其諸事跡草

堂集序范傳正撰新墓碑亦略而詳矣史又撰李白  
傳一卷事又稍周然有三事近方得之開元中禁中  
初重木芍藥即今牡丹也開元天寶花木記云禁中  
中呼木芍藥為牡丹得  
四本紅紫淺紅通白者上因移植於興慶池東沉香  
亭前會花方繁開上乘照夜車太真妃以步輦從詔  
選梨園弟子中尤者得樂一十六色李龜年以歌擅  
一時之名手捧檀板押衆樂前將欲歌之上曰賞名  
花對妃子焉用舊樂辭焉遽命龜年持金花牋宣賜  
翰林供奉李白立進清平調詞三章白欣然承詔旨  
由若宿醒未解因援筆賦之其一曰雲想衣裳花想  
容春風拂檻露華濃若非羣玉山頭見會向瑤臺月

下逢其二曰一枝紅艷露凝香雲雨巫山枉斷腸借  
問漢宮誰得似可憐飛燕倚新粧其三曰名花傾國  
兩相歡長得君王帶笑看解釋春風無限恨沉香亭  
北倚闌干龜年以歌辭進上命梨園弟子略約調撫  
絲竹遂促龜年以歌之太真妃持頗梨七寶杯酌西  
涼州蒲萄酒笑領歌辭意甚厚上因調玉笛以倚曲  
每曲徧將換則遲其聲以媚之太真妃飲罷斂繡巾  
重拜上自是顧李翰林尤異於諸學士會高力士終  
以脫靴為深恥異曰太真妃重吟前辭力士曰始為  
妃子怨李白深入骨髓何翻拳拳如是耶太真妃因  
驚曰何翰林學士能欲辱人如斯力士曰以飛燕指

妃子賤之甚矣太真妃頗深然之上嘗三欲命李白  
官卒為宮中所捍而止白嘗有知鑒客并州識汾陽  
王郭子儀於行伍間為脫其刑責而獎重之及翰林  
坐永王之事汾陽功成請以官爵贖翰林上許之因  
而免誅翰林之知人如此汾陽之報德如彼白之從  
弟令問常目白曰兄心肝五臟皆錦繡耶不然何開  
口成文揮翰霧散耳耳傳中漏此三事今書於序中白  
有歌云吟詩作賦北窻裏萬言不及一杯水蓋歎乎  
有其時而無其位嗚呼以翰林之才名遇立宗之知  
見而乃飄零如是宋中丞薦於聖真云一命不霑四  
海稱屈得非命歟白居易贈劉禹錫詩云詩稱國手

徒為爾命壓人頭不柰何斯言不虛矣凡百有位無  
自輕焉撰集之次聊存梗槩而已時在繞雷州中咸  
平元年三月三日序

故翰林學士李君墓誌并序 李華

嗚呼姑孰東南者山北址有唐高士李白之墓嗚呼  
哀哉夫仁以安物公其懋焉義以濟難公其志焉識  
以辯理公其博焉文以宣志公其懿焉宜其上為王  
師下為伯友年六十有二不偶賦臨終歌而卒悲夫  
聖以立德賢以立言道以恒世言以經俗雖曰死矣  
吾不謂其亡矣也有子曰伯禽天然長能持幼能辯  
數梯公之德必將大其名也已矣銘曰

立德謂聖立言謂賢嗟君之道竒於人而侔於天哀哉  
唐故翰林學士李君碣記

尚書膳部員外郎劉全白撰

朝議郎行當塗縣令顧游秦建

君名白廣漢人性倜儻好縱橫術善賦詩才調逸邁  
往往與會屬詞恐古之善詩者亦不逮尤工古歌少  
任俠不事產業名聞京師天寶初玄宗辟翰林待詔  
因為和蕃書并上宣唐鴻猷一篇上重之欲以綸誥  
之任委之同列者所謗詔令歸山遂浪跡天下以詩酒  
自適又志尚道術謂神仙可致不求小官以當世之  
務自負流離軼軻竟無所成名有子名伯禽偶遊至

此遂以疾終因葬於此文集亦無定卷家家有之代  
宗登極廣拔淹瘁時君亦拜拾遺聞命之後君亦逝  
矣嗚呼與其才不與其命悲夫全白幼則以詩為君  
所知及此投弔荒墳將毀追想音容悲不能止邑有  
賢宰顧公遊秦恣好為詩亦常慕效李君氣調因嗟  
盛才冥寞遂表墓式墳乃題貞石冀傳於往來也貞  
元六年四月七日記沙門履文書墳去墓記一百二  
十步

唐左拾遺翰林學士李公新墓碑并序

宣歙池等州觀察使范傳正

騏驥筋力成意在萬里外歷塊一蹶斃於空谷唯餘

駿骨價重千金大鵬羽翼張勢欲摩穹昊天風不來  
海波不起塌翅別島空留大名人亦有之故左拾遺  
翰林學士李公之謂矣公名白字太白其先隴西成  
紀人絕嗣之家難求譜牒公之孫女搜於箱篋中得  
公之亡子伯禽手疏十數行紙壞字缺不能詳備約  
而計之涼武昭王九代孫也隋末多難一房被竄于  
碎葉流離散落隱易姓名故自國朝已來漏於屬籍  
神龍初潛還廣漢因僑焉郡人父客以逋其邑遂以  
客爲名高卧雲林不求祿仕公之生也先府君指天  
枝以復姓先夫人夢長庚而告祥名之與字咸所取  
象受五行之剛氣叔夜心高挺三蜀之雄才相如文

逸瓌奇宏廓拔俗無類少以俠自任而門多長者車  
常欲一鳴驚人一飛冲天彼漸陸遷喬皆不能也由  
是慷慨自負不拘常調器度弘大聲聞于天天寶初  
召見於金鑿殿玄宗明皇帝降輦步迎如見園綺論  
當世務草荅蕃書辯如懸河筆不停綴玄宗嘉之以  
寶牀方丈賜食於前御手和羹德音褒美褐衣恩遇  
前無比儔遂直翰林專掌密命將處司言之任多陪  
侍從之遊他日泛白蓮池公不在宴皇歡既洽召公  
作序時公已被酒於翰苑中仍命高將軍扶以登舟  
優寵如是既而上疏請還舊山玄宗甚愛其才或慮  
乘醉出入省中不能不言溫室樹恐掇後患惜而遂

之公以爲千鈞之弩一發不中則當摧撞折牙而求  
息機用安能傲碌碌者蘇而復上哉脫屣軒冕釋羈  
韁鎖因肆情性大放宇宙間飲酒非嗜其酣樂取其  
昏以自富作詩非事於文律取其吟以自適好神仙  
非慕其輕舉將不可求之事求之欲耗壯心遺餘年  
也在長安時秘書監賀知章号公爲謫仙人吟公烏  
栖曲云此詩可以哭鬼神矣時人又以公及賀監汝  
陽王崔宗之裴周南等八人爲酒中八仙朝列賦謫  
仙歌百餘首俄屬戎馬生郊遠身海上往來於斗牛  
之分優游没身偶乘扁舟一日千里或遇勝境終年  
不移時長江遠山一泉一石無往而不自得也晚歲

渡牛渚磯至姑熟悅謝家青山有終焉之志盤桓利  
居竟卒於此其生也聖朝之高士其往也當塗之旅  
人代宗之初搜羅俊逸拜公左拾遺制下於彤庭禮  
降於玄壤生不及祿歿而稱官嗚呼命歟傳正生唐  
代甲子相懸當於先大夫文字中見與公有潯陽夜  
宴詩則知與公有通家之舊早於人間得公遺篇逸  
句吟詠在口無何叨蒙恩獎廉問宣池按圖得公之  
墳墓在當塗邑因令禁樵採備洒掃訪公之子孫故  
申慰薦凡三四年乃獲孫女二人一爲陳雲之室一  
乃劉勸之妻皆編戶畊也因召至郡庭相見與語衣  
服村落形容朴野而進退閑雅應對詳諦且祖德如

在儒風宛然問其所以則曰父伯禽以貞元八年不  
祿而卒有兄一人出遊一十二年不知所在父存無  
官父歿為民有兄不相保為天下之窮人無桑以自  
蠶非不知機杼無田以自力非不知稼穡况婦人不  
任布裙糲食何所仰給儷于農夫救死而已久不敢  
聞於縣官懼辱祖考鄉閭逼迫忍恥來告言訖淚下  
余亦對之泣然因云先祖志在青山遺言宅兆頃屬  
多故殯於龍山東麓地近而非本意墳高三尺日益  
摧圯力且不及知如之何聞之憫然將遂其請因當  
塗令諸葛縱會計在州得諭其事縱亦好事者學為  
歌詩樂聞其語便道還縣躬相地形卜新宅于青山

之陽以元和十二年正月二十三日遷神于此遂公  
之志也西去舊墳六里南抵驛路三百步北倚謝公  
山即青山也天寶十二載勅改名焉因告二女將改  
適於士族皆曰夫妻之道命也亦分也在孤窮既失  
身於下俚仗威力乃求援於他門生縱偷安死何面  
目見大父於地下欲敗其類所不忍聞余亦嘉之不  
奪其志復并稅免徭役而已今士大夫之葬必誌於  
墓有勲庸道德之家兼樹碑于道余才術貧虛不能  
兩致今作新墓銘輒刊二石一寘于泉扃一表于道  
一作路亦峴首漢川之義也庶芳聲之不泯焉文集二  
十卷或得之於時之文士或得之於宗族編輯斷簡

以行于代銘曰

嵩嶽降神是生輔臣蓬萊譴真斯為逸人晉有七賢  
唐稱八仙應彼星象唯公一焉晦以麴蘖暢於文篇  
萬象奔走乎筆端萬慮泯滅乎樽前卧必酒甕行惟  
酒舩吟風詠月席地幕天但貴乎適其所適不知夫  
所以然而然至今尚疑其醉在千日寧審乎壽終百  
年謝家山兮李公墓異代詩流同此路舊墳卑庠風  
雨侵新宅爽塏松栢林故鄉萬里且無嗣二女從民  
永於此猗歟琢石為二碑一藏幽隧一臨岐岸深谷  
高變化時一存一毀名不虧

翰林學士李公墓碑

前守秘書省校書郎裴昶

李翰林名白字太白以詩著名召入翰林世稱才名  
占得翰林他人不復爭先其後以脅從得罪既免遂  
放浪江南死宣城葬當塗青山下李陽冰序詩集粗  
具行止昶嘗遊江表過其墓下愛其才壯其氣味其  
嗜酒知其取適作碑於墓且曰先生得天地秀氣耶  
不然何異於常之人耶或曰太白之精下降故字太  
白故賀監號為謫仙不其然乎故為詩格高旨遠若  
在天上物外神仙會集雲行鶴駕想見飄然之狀視  
塵中屑屑米粒蟲睫紛擾菌蠢羈絆蹂躪之比又嘗  
有知鑒客并州識郭汾陽於行伍間為免脫其刑責

而獎重之後汾陽以功成官爵請贖翰林上許之因免誅其報也又常心許劍舞裴將軍子曾叔祖也嘗投書曰如白願出將軍門下其文高其氣雄世稀其本懼失其傳故序傳之大和初文宗皇帝命翰林學士為三絕贊公之詩歌與將軍劍舞洎張旭長史草書為三絕夫天付上才必同靈氣賢傑相投龍虎兩合可為知者言非常人所知也夫古以名德稱占其官謚者甚希前以詩稱者若謝吏部何水部陶彭澤鮑參軍之類唐朝以詩稱若王江寧宋考功韋蘇州王右丞杜貞外之類以文稱者若陳拾遺蘇司業元容州蕭功曹韓吏部之類以德行稱者元魯山陽道

州以直稱者魏文貞狄梁公以忠烈稱者顏魯公段太尉以武稱者李衛公英公以學行文翰俱稱者虞秘監唐之得人於斯為盛翰林其以詩稱之一也予嘗過當塗訪翰林舊宅又於浮圖寺化城之僧得翰林自寫訪賀監不遇詩云東山無賀老却棹酒舡回味之不足重之為寶用獻知者又於歷陽郡得翰林與劉尊師書一紙思高筆逸又嘗遊上元蔣山寺見翰林讚志公云水中之月了不可取刀齊尺量扇迷陳語文簡事備誠為作者附於此云會昌三年二月中敬自溟水草堂南遊江左過公墓下四過青山兩發塗口徘徊不忍去與前濮州鄆城縣尉李劭同以

公服拜其墓問其墓左人畢元宥實備洒掃留縣帛  
 具酒饌祭公知公無孫有孫女二人一娶劉勸一娶  
 陳雲皆農夫也且曰二孫女不拜墓已五六年矣因  
 告邑宰李君都傑請免畢元宥力役俾專洒掃事嘻  
 享名甚高後事何薄謝公舊井新墓角落青山白雲  
 共為蕭索巨竹拱墓如公卓犖天長地久其名不朽  
 此為祭文寫授元宥又為碑曰  
 貴盡皆然名存則難故子重名不重官作李翰林碑  
 十五字而已

李翰林文集卷第一

吳門繆晁武子甫重刊宋本

李太白文集卷第二

歌詩五十九首

古風上

古風五十九首

大雅久不作吾衰竟誰陳王風委蔓草戰國多荆榛  
 龍虎相啖食兵戈逮狂秦正聲何微茫哀怨起騷人  
 揚馬激頽波開流蕩無垠廢興雖萬變憲章亦已淪  
 自從一作建一作安來綺麗不足珍聖代復元古垂衣貴清  
 真羣才屬休明乘運共躍鱗文質相炳煥眾星羅秋  
 旻我志在刪述重輝映千春希聖如有立絕筆於獲  
 麟

蟾蜍薄太清，蝕此瑤臺月。圓光虧中天，金魄遂淪沒。  
蟬竦入紫微，大明夷朝暉。浮雲隔兩耀，萬象昏陰霏。  
蕭蕭長門宮，昔是今日非。桂蠹花不實，天霜下巖威。  
沉歎終永夕，感我涕沾衣。  
秦皇掃六合，虎視何雄哉。揮劍決浮雲，諸侯盡西來。  
明斷自天啓，一作雄圖大略駕羣才。收兵鑄金人，函谷  
正東開。銘功會稽嶺，聘望琅邪臺。刑徒七十萬，起土  
驪山隈。尚採不死藥，茫然使心哀。一作哀連弩射海魚長  
鯨正崔嵬，額鼻象五嶽。揚波噴雲雷，鬚鬣蔽青天。何  
由覩蓬萊，徐市載秦女。樓船幾時回，但見三泉下。金  
棺葬寒灰。

鳳飛九千仞，五章備綵珍。銜書且虛歸，空入周與秦。  
橫絕歷四海，所居未得鄰。吾營紫河車，千載落風塵。  
藥物祕海嶽，採鉛青溪濱。時登大樓山，舉首望仙真。  
羽駕滅去影，飈車絕回輪。尚恐丹液遲，志願不及申。  
徒霜鏡中髮，羞彼鶴上人。桃李何處開，此花非我春。  
唯應清都境，長與韓眾親。  
太白何蒼蒼，星辰上森列。去天三百里，邈爾與世絕。  
中有綠髮翁，披雲一作春吐松雪。不笑亦不語，冥棲在  
巖穴。我來逢真人，長跪問寶訣。粲然忽自哂，一作啓授  
以鍊藥說。銘骨傳其語，竦身已電滅。仰望不可及，蒼  
然五情熱。吾將營丹砂，永與世人別。

代馬不思越越禽不戀燕情性有所習土風固其然  
昔別鴈門關今戍龍庭前驚沙亂海日飛雪迷胡天  
蟣蝨生虎鷄心魂逐旌旃苦戰功不賞忠誠難可宣  
誰憐李飛將白首沒三邊

客有鶴上仙飛飛凌太清揚言碧雲裏自道安期名

兩兩白玉童雙吹紫鸞笙去影忽不見回風送天聲

舉首遠望之一一作我欲飄然若流星願食金光草壽與

天齊頌一作五鶴西北來飛飛凌太清仙人綠雲上自道安期名兩

草服之四體輕將隨赤松去對博生蓬瀛

莊周夢蝴蝶蝴蝶為莊周一體更變易萬事良悠悠

乃一作知蓬萊水復作清淺流青門種瓜人舊日東陵

侯富貴固一作如此營營何所求

齊有侗儻生魯連特高妙明月出海底一朝開光曜

却秦振英聲後世仰末照意輕千金贈顧向平原笑

吾亦澹蕩人拂衣可同調

黃河走東溟白日落西海逝川與流光飄忽不相待

春容捨我去秋髮已衰改人生非寒松年一作豈長

在吾當乘雲螭吸景駐光彩一作誰能學天

松栢本孤直難為桃李顏昭昭嚴子陵垂釣滄波間

身將客星隱心與浮雲閑長揖萬乘君還歸富春山

清風灑六合邈然不可攀使我長歎息冥棲巖石間

君平既棄世世亦棄君平觀變窮太易探元一作化羣

生寂寞綴道論一作真道空簾閉幽情一作清騶虞不虛一作復來  
鶯鶯有時鳴安知天漢上白日懸高名海客去已久  
誰人一作能測沉冥

胡關饒風沙蕭索一作颯竟終古歲落秋草黃登高望戎  
虜荒城空大漠邊邑無遺堵白骨橫千霜嵯峨蔽榛  
莽借問誰陵虐天驕毒威武赫怒我聖皇勞師事鼙  
鼓陽和變殺氣發卒騷中土三十六萬人哀哀淚如  
雨且悲就行役安得營農圃不見征戎兒豈知關山  
苦一本此下添爭鋒徒死節秉錢皆庸李牧今不在一作衛霍  
豎戰士塗蒿萊將軍獲圭組四句

邊人飼豺虎

燕昭延郭隗遂築黃金臺劇辛方趙至一作往鄒衍復齊

來奈何青雲士棄我如塵埃珠玉買歌笑糟糠養賢  
才方知黃鶴舉千里獨徘徊

金華牧羊兒乃是紫煙客我願從之遊未去髮已白  
不知繁華一作朱顏子擾擾何所迫崑山採瓊藥一作雜可以鍊

精魄

天津三月時千門桃與李朝為斷腸花暮逐東流水

前水復一作後水古今相續流一作今人非舊人年年橋

上遊鷄鳴海色動謁帝羅公侯月落西上陽一作上餘

輝半城樓衣冠照雲日朝下散皇州鞍馬如飛龍黃

金絡馬頭行人皆闕易志氣橫嵩丘入門上高堂列

鼎錯珍羞香風引趙舞清管隨齊謳七十紫鴛鴦雙

雙戲庭幽行樂爭晝夜自言度千秋功成身不退自古多愆尤黃犬空歎息綠珠成釁讎何如鷓鴣子散

髮棹一作弄扁舟

西上一作藏蓮花山迢迢見明星素手把芙蓉虛步躡太

清霓裳曳廣帶飄拂昇天行邀我登雲臺高揖衛叔

卿恍恍與之去駕鴻凌紫冥俯視洛陽川茫茫走胡

兵流血塗野草豺狼盡冠纓

昔我遊齊都登華不注峯茲山何峻秀綠翠如芙蓉

蕭颯古仙人了知是赤松借予一白鹿自挾兩青龍

含笑凌倒景欣然願相從

泣與親友別欲語再三咽勗君青松心努力保霜雪

世路多險艱白日欺紅顏分首各千里去去何時還

在世復幾時倏如飄風度空聞紫金經白首愁相誤

撫已忽自笑沉吟為誰故名利徒煎熬安得閑余步

終留赤玉舄東上蓬山一作來路秦帝如我求蒼蒼但煙

霧

郢客吟白雪遺響飛青天徒勞歌此曲舉世誰為傳

試為巴人唱和者乃數千舌聲何足道歎息空悽然

秦水別隴首幽咽多悲聲胡馬顧朔雪躩蹀長嘶鳴

感物動我心緬然含歸情昔視秋蛾飛今見春蠶生

嫋嫋桑枯一作結葉萋萋柳垂榮急節謝流水羈心搖懸

旌揮涕且復去惻愴何時平

秋露白如玉團團下庭綠我行忽見之寒早悲歲促  
生猶鳥過目胡乃自結束景公一何愚牛山淚相續  
物苦不知足登一作隴又望蜀人心若波瀾世路有一作多

屈曲三萬六千日夜夜當秉燭

大車揚飛塵亭午暗阡陌中貴多黃金連雲開甲宅  
路逢鬪雞者冠蓋何輝赫鼻息干虹蜺行人皆怵惕  
世無洗耳翁誰知堯與跖

世道日交喪澆風散淳源不采芳桂枝反棲惡木根  
所以桃李樹吐花竟不言大運有興沒羣動爭飛奔  
歸來廣成子去入無窮門

碧荷生幽泉朝日豔且鮮秋花冒綠水密葉羅青煙

秀色空絕世馨香誰為傳坐看飛霜滿凋此紅芳年  
結根未得所願託華池邊

燕趙有秀色綺樓青雲端眉目豔皎月一笑傾城歡  
常恐碧草晚坐泣秋風寒纖手怨玉琴清晨起長歎  
焉得偶君子共乘雙飛鸞

容顏若飛電時景如飄風草綠霜已白日西月復東  
華鬢不耐秋颯然成衰蓬古來賢聖人一一誰成功  
君子變猿鶴小人為沙蟲不及廣成子乘雲駕輕鴻  
三季分戰國七雄成亂麻王風何怨怒世道終紛拏  
至人洞元象高舉凌紫霞仲尼亦一作欲浮海吾祖之流  
沙聖賢共淪沒臨歧胡咄嗟

玄風變太古道喪無時還擾擾季葉一作市井人雞鳴趨四

關但識金馬門誰一作距知蓬萊山白首死羅綺笑歌無

休一作時閑綠酒晒丹液青娥凋素顏一作萋萋千金骨風塵凋素顏大儒揮

金槌琢之一作發塚詩禮間蒼蒼三珠樹冥目焉能攀

鄭客西入關行行未能已白馬華山君相逢平原里

璧遺鎬池公明年祖龍死秦人相謂曰吾屬可去矣

一往桃花源千春隔流水

蓐收肅金氣西陸弦海月秋蟬號階軒感物憂不歇

良辰竟何許大運有淪忽天寒悲風生夜久衆星沒

惻惻不忍言哀歌達明發

北溟有巨魚身長數千里仰噴三山雪橫吞百川水

憑凌隨海運烜赫因風起吾觀摩天飛九萬方未已

羽檄如流星虎符合專城喧呼救邊急羣鳥皆夜鳴

白日曜紫微三公運權衡天地皆得一澹然四海清

借問此何為蒼言楚徵兵一作征楚兵渡瀘及五月將赴雲

南征怯卒非戰士炎方難遠行長號別嚴親日月慘

光晶泣盡繼以血心摧兩無聲困獸當猛虎窮魚餌

奔鯨千去不一回投軀豈全生如何舞干戚一使有

苗平

醜女來効嘔還家驚四鄰壽陵失本步笑殺邯鄲人

一曲一作東西斐然子雕蟲喪天真棘刺造沐猴三年費精

神功成無所用楚楚且華一作榮身大雅思文王頌聲久

崩淪安得郢中質一揮成風斤

一作承風

抱玉入楚國見疑古所聞良寶終見棄徒勞三獻君

直木忌先伐芳蘭哀自焚盈滿天所損沉冥道為羣

東海汎碧水一作流西關乘紫雲魯連及柱史可以躡清芬

燕臣昔慟哭五月飛秋霜庶女號蒼天震風擊齊堂

精誠有所感造化為悲傷

本此下添而我竟何辜遠身金殿旁

浮雲蔽紫

闔白日難回光羣沙穢明珠衆草凌孤芳古來共歎

息流淚空沾裳

孤蘭生幽園衆草共蕪沒雖照陽春暉復悲高秋月

飛霜早浙瀝綠豔恐休歇若無清風吹香氣為誰發

登高望四海天地何漫漫霜被羣物秋風飄大荒寒

榮華東流水萬事皆波瀾白日掩徂暉浮雲無定端

梧桐巢鸞雀枳棘棲鴛鴦且復歸去來劔歌行一作悲路

難一本自第四句後云殺氣落喬木浮雲蔽層巒孤鳳

難鳴天霓遺聲何辛酸遊人悲舊國撫心亦盤相倚劔

鳳飢不啄粟所食唯琅玕焉能與羣雞感一作刺促爭一

食朝鳴崑丘樹夕飲砥柱湍歸飛海路遠獨宿天霜

寒幸遇王子晉結交青雲端懷恩未得報感別空長

歎

朝弄紫泥海一作朝駕夕披丹霞裳揮手折若木拂此

西日光雲卧一作舉遊八極玉顏已千霜飄飄入無倪稽

首祈上皇呼我遊太素玉杯賜瓊漿一餐歷萬歲何

用還故鄉永隨長風去天外恣飄揚

搖裔雙白鷗鳴飛滄江流宜與海人狎豈伊雲鶴儔

寄影宿沙月泐芳戲春洲吾亦洗心者忘機從爾遊

周穆八荒意漢皇萬乘尊淫樂心不極雄豪安足論

西海宴王母北宮邀上无瑶水聞遺歌玉杯竟空言

靈跡成蔓草徒悲千載魂

綠蘿紛葳蕤繚繞松栢枝草木有所託歲寒尚不移

奈何天桃色坐歎葑菲詩玉顏豔紅彩雲髮非素絲

君子恩已畢賤妾將何為

八荒馳驚颯萬物盡凋落浮雲蔽頽陽洪波振大壑

龍鳳脫罔罟飄飄將安託去去乘白駒空山詠揚藿

一百四十年國容何赫然隱五鳳樓峨峨橫三川

王侯象星月賓客如雲煙麗一本首六句云帝京信佳

關歌鍾沸三川蓬萊鬪雞金宮城一作裏蹴踘瑶臺邊

象天構珠翠誇雲仙蘭臺邊一作走馬舉動搖白日指揮回青天當塗何翁忽失

路長棄捐獨有楊執戟閉關草太玄

桃花開東園含笑誇白日偶蒙春風榮生一作此豔陽

質豈無佳人色但恐花不實宛轉龍火飛零落早相

失詎知南山松獨立自蕭颯

秦皇按寶劍赫怒振威神逐日巡海右驅石架滄津

徵卒空九寓作橋傷萬人但求蓬島藥豈思農鴈春

力盡功不贍千載為悲辛

美人出南國灼灼芙蓉姿皓齒終不發芳心空自持  
由來紫宮女共妬青蛾眉歸去瀟湘沚沉吟何足悲  
宋國梧臺東野人得燕石一作宋人枉千金去國買燕石誇作天下珍  
却哂趙王璧趙璧無緇磷燕石非真真流俗多錯誤  
豈知玉與珉  
殷后亂天紀楚懷亦已昏夷羊滿中野綠苑盈高門  
比干諫而死屈平竄湘源虎口何婉孌女顏空嬋娟  
彭咸久淪沒此意與誰論  
青春流鶻湍朱明一作火驟回薄不忍看秋蓬飄揚竟何  
託光風滅蘭蕙白露灑葵藿一作委蕭藿美人不我期草木  
日零落


戰國何紛紛兵戈亂浮雲趙倚兩虎鬪晉爲六卿分  
姦臣欲竊位樹黨自相羣果然田成子一旦弑齊君  
倚劍登高臺悠悠送春日蒼榛蔽層丘瓊草隱深谷  
鳳皇鳴西海欲集無珍木鷲斯得匹一作所居樓蒿下盈  
萬族晉風日已頽窮途方慟哭一本首四句以下去翻翻衆鳥飛翔翔在珍木羣  
花亦便娟榮耀非一族歸來愴途窮日暮還慟哭  
齊瑟彈一作揮東吟秦絃弄西音慷慨動顏魄使人成荒  
淫彼女佞邪子婉孌來相尋一笑雙白璧再歌千黃  
金珍色不貴道詎惜飛光沉安識紫霞客瑤臺鳴玉

一作素琴  
越客採明珠提攜出南隅清輝照海月美價傾鴻一作皇

都獻君君按劍懷寶空長吁魚目復相哂寸心增煩  
紆

羽族稟萬化小大各有依凋凋亦何辜六翮掩不揮  
願銜衆禽翼一向黃河飛飛者莫我顧歎息將安歸  
我行巫山渚尋古登陽臺天空綵雲滅地遠清風來  
神女去已久襄王安在哉荒淫竟淪沒樵牧徒悲哀  
惻惻泣路岐哀哀悲素絲路岐有南北素絲易一作變  
移一本下添萬事固如此覆人生無定期田實相傾奪  
同谷風刺輕薄交道方嶮巖斗酒強然諾寸心終自  
疑張陳竟火滅蕭朱亦星離衆鳥集榮柯窮魚守空  
池嗟嗟失權客勤問何所規一作悲又作勤問何所窺

李太白文集卷第二



吳門繆晷武子甫重刊宋本


李太白文集卷第三

歌詩三十一首

樂府一

遠別離

遠別離古有黃英之二女乃在洞庭之南瀟湘之浦  
海水直下萬里深誰人不言此離苦日慘慘兮雲冥  
冥猩猩啼煙兮鬼嘯雨我縱言之將何補皇穹竊恐  
不照余之忠誠雷憑憑兮欲吼怒堯舜當之亦禪禹  
君失臣兮龍為魚權歸臣兮鼠變虎或云堯幽囚舜  
野死九疑聯綿皆相似重瞳孤墳竟何是帝子泣兮  
綠雲間隨風波兮去無還慟哭兮遠望見蒼梧之深



山蒼梧山崩湘水絕竹上之淚乃可滅

公無渡河

黃河西來決崑崙咆哮萬里觸龍門波滔天堯咨嗟  
大禹理百川兒啼不窺家殺湍堙洪水九州始蠶麻  
其害乃去茫然風沙被髮之叟狂而癡清晨徑一作臨流  
欲奚為旁人不惜妻止之公無渡河苦渡之虎可搏  
河難憑公果溺死流海湄有長鯨白齒若雪山公乎  
公乎挂骨於其間篋篋所悲竟不還

蜀道難

諷章仇兼瓊也

噫吁噓危乎高哉蜀道之難難於上青天蠶叢及魚  
鳧開國何茫然爾來四萬八千歲一作乃與秦塞通人

煙西當太白有鳥道何一作可以橫絕峨眉巔地崩山摧

壯士死然後天梯石棧方一作相鉤連上有六龍回日之

高標一作橫河斷海之浮雲下有衝波逆折之回川黃鶴之飛尚

不得一作過猿猱欲度愁攀緣一作攀青泥何盤盤百步九折

縈巖巒捫參歷井仰脅息以手撫膺坐長歎問君西

遊何時還畏途巉巖不可攀但見悲鳥號古木雄飛

雌從遶林間又聞子規啼夜月愁空山蜀道之難難

於上青天使人聽此凋朱顏連峯去天不盈尺一作入煙幾千

尺枯松倒挂倚絕壁飛湍瀑流爭喧豨砢崖轉石萬

壑雷其嶮也若此嗟爾遠道之人胡為乎來哉劔閣

崢嶸而崔嵬一夫當關萬人一作夫莫開所守或匪親一作人

化爲狼與豺朝避猛虎夕避長蛇磨牙吮血殺人如  
麻錦城雖云樂不如早還家蜀道之難難於上青天  
側身西望長咨嗟一作令人嗟

梁甫吟

長嘯梁甫吟何時見陽春君不見朝歌屠叟辭棘津  
八十西來釣渭濱寧羞白髮照淥水逢時壯一作壯氣思  
經綸廣張三千六百鈞一作鈞風期暗與文王親大賢虎  
變愚不測當年頗似尋常人君不見高陽酒徒起草  
中長揖山東隆準公入門開說一作開游說騁雄辯兩女輟  
洗來趨風東下齊城七十二指麾楚漢如旋蓬狂客  
一作生落拓尚如此何況壯士當羣雄我欲攀龍見明主

雷公砰訇震天鼓帝旁投壺多玉女三時大笑開電  
光倏爍晦冥起風雨閭闔九門不可通以額叩關闔  
者怒白日不照吾精誠祀國無事憂天傾猘猱磨牙  
競人肉騶虞不折生草莖手接飛猱搏彫虎側足焦  
原未言苦智者可卷愚者豪世人見我輕鴻毛力排  
南山三壯士齊相殺之費一桃吳楚弄兵無劇孟亞  
夫哈爾爲徒勞梁甫吟聲正悲張公兩龍劍神物合  
有時風雲感會起屠釣大人峴岬當安之

烏夜啼

黃雲城邊烏欲棲歸飛啞啞枝上啼機中織錦秦川  
女一作閨中織碧紗如煙隔窻語停梭悵然一作望憶遠人

一作問人  
憶故夫獨宿孤房一作獨宿空堂  
一作知在流沙淚如雨一作停梭向人  
問故夫知在關

烏棲曲

姑蘇臺上烏棲時吳王宮裏醉西施吳歌楚舞歡未  
畢青山猶銜半邊日銀箭金壺一作金壺丁丁漏水多起看秋  
月墜江波東方漸高奈樂何一作爾何

戰城南

去年戰桑乾源今年戰蔥河道洗兵條支海上波放  
馬天山雪中草萬里長征戰三軍盡衰老匈奴以殺  
戮為耕作古來唯見白骨黃沙田秦家築城備胡處  
漢家還有烽火燃烽火燃不息征戰一作長征無已時野戰

格鬪死敗馬號鳴向天悲烏為啄人腸銜飛上挂枯

樹枝一作上枯枝士卒塗草莽將軍空爾為乃知兵者是凶

器聖人一作君不得已而用之

將進酒一作惜空樽酒

君不見黃河之水天上來奔流到海不復回君不見

高堂明鏡悲白髮朝如青絲暮成一作如雪人生得意須

盡歡莫使金樽空對月天生我材必有用一作開又云天生我身必

有財又作天生吾徒有俊材千金散盡還復來烹羊宰牛且為樂

會須一飲三百杯岑夫子丹丘生進酒君莫停一作將進酒杯

莫與君歌一曲請君為我傾耳聽鍾鼓饌玉不足貴

一作玉帛但願長醉不用一作復醒古來聖賢皆寂寞一作死盡唯

有飲者留其名陳王昔時一作宴平樂斗酒十千恣歡  
謔主人何爲言少錢徑須沽取對君酌一作且須沽酒共君酌五花  
馬千金裘呼兒將出換美酒與爾同銷萬古愁

行行且遊獵篇

邊城兒生年不讀一字書但知遊獵誇輕趨胡馬秋  
肥宜白草騎來躡影何矜驕一作可憐驕金鞭拂雪揮鳴鞘  
半酣呼鷹出遠郊弓彎一作彎滿月不虛發雙鶴迸落連  
飛髀海邊觀者皆辟易一作易猛氣英風振沙磧儒生不及  
遊俠人白首垂帷復何益

飛龍引二首

黃帝鑄鼎於荆山鍊丹砂丹砂成黃金騎龍飛去太

上家雲愁海思令人嗟宮中綵女顏如花飄然揮手  
凌紫霞從風縱體登鑾一作鸞車登鑾車侍軒轅遨遊青  
天中其樂不可言

鼎湖流水清且閑軒轅去時有弓劍古人傳道留其  
間後宮嬋娟多花顏乘鸞飛煙亦不還騎龍攀天造  
天關造天關聞天語屯雲河車載玉女載玉女過紫  
皇紫皇乃賜白兔所擣之藥方後天而老凋三光下  
視瑤池見王母蛾眉蕭颯如秋霜

天馬歌

天馬來出月支窟背爲虎文龍翼骨嘶青雲振綠鬣  
蘭筋權竒走滅沒騰崑崙崑崙歷西極四足無一蹶雞鳴

刷燕哺秣越神行電邁躡恍惚天馬呼飛龍一作黃趨目  
明長庚臆雙鳧尾如流星首渴烏口噴紅光汗溝珠  
曾陪時龍躍天衢羈金絡月照星一作皇都逸氣稜稜凌  
九區白壁如山誰敢法回頭笑紫鸞但覺爾輩愚天  
馬奔戀君軒駛躍驚矯浮雲翻萬里足躑躅遙瞻閭  
闔門不逢寒風子誰採逸景孫白雲在青天丘陵遠  
崔嵬鹽車上峻坂倒行逆施畏日晚伯樂剪拂中道  
遺少盡其力老棄之願逢田子方惻然為我思一作悲雖  
有玉山禾不能療苦一作我肌嚴霜五月凋桂枝伏櫪銜  
冤摧兩眉請君贖獻穆天子猶堪弄影舞瑤池

行路難三首第三首一作古興

金罇清酒斗十千玉盤珍羞直萬錢停盃投筋不能  
食拔劍四顧心茫然欲渡黃河冰塞川將登太行雪  
暗天一作滿山閑來垂釣坐一作碧溪上忽復乘舟夢日邊行路  
難行路難多岐路今安在長風破浪會有時直挂雲  
帆濟滄海

大道如青天我獨不得出羞逐長安社中兒赤雞白  
狗一作雉賭梨栗彈劍作歌奏苦聲曳裾王門不稱情淮  
陰市井笑韓信漢朝公卿一作已賈生君不見昔時燕家  
重郭隗擁篲折節無嫌猜劇辛樂毅感恩分輸肝剖  
膽効英一作俊才昭王白骨縈蔓草誰人更掃黃金臺行  
路難歸去來

有耳莫洗穎川水有口莫食首陽蕨含光混世貴無  
名何用孤高比雲月吾觀自古賢達人功成不退皆  
殞身子胥既棄吳江上屈原終投湘水濱陸機雄才  
豈自保李斯稅駕苦不早華亭鶴唳詎可聞上蔡蒼  
鷹何足道君不見吳中張翰稱一作真達生秋風忽憶江  
東行且樂生前一杯酒何須身後千載名

長相思

長相思在長安絡繹秋啼金井欄微一作凝霜淒淒簾色  
寒孤燈不明一作寐思欲絕卷帷望月空長歎美人如  
花一作期一作迢迢隔雲端上有青冥之高天下有淥水之波瀾  
天長路遠魂飛苦夢魂不到關山難長相思摧心肝

上留田

行至上留田孤墳何崢嶸積此萬古恨春草不復生  
悲風四邊來腸斷白楊聲借問誰家地埋沒蒿里塋  
古老向余言言是上留田蓬科馬鬣今已平昔之弟  
死兄不葬他久於此舉銘旌一鳥死百鳥鳴一獸走  
百獸齧桓一作常山之禽別離苦欲去回翔不能征田氏  
倉卒骨肉分青天白日摧紫荆交讓之木本同形東  
枝顛顛西枝榮無心之物尚如此參商胡乃尋天兵  
孤竹延陵讓國揚名高風緬邈頽波激清尺布之謠  
塞耳不能聽

春日行

深宮高樓入紫清金作蛟龍盤繡楹一作繡作楹佳人當窻  
弄白日絃將手語彈鳴箏春風吹落君王耳此曲乃  
是昇天行因出天池汎蓬瀛樓船盛香波浪驚三千  
雙蛾獻歌笑擗鐘考鼓宮殿傾萬姓聚舞歌太平我  
無爲人自寧三十六帝欲相迎仙人飄翻下雲軒帝  
不去留鎬京安能爲軒轅獨往入窅冥小臣拜獻南  
山壽陛下萬古垂鴻名

前有樽酒行二首

春風東來忽相過金樽淥酒生微波落花紛紛稍覺  
多美人欲醉朱顏醜青軒桃李能幾何流光欺人忽  
蹉跎君起舞日西一作夕當年意氣不肯傾白髮如絲

一作白首垂絲歎何益

琴奏龍門之綠桐玉壺美酒清若空催絃拂柱與君  
飲看朱成碧顏始紅一作眼白看杯顏色紅胡姬貌如花當壚笑  
春風笑春風舞羅衣君今不醉欲安歸

夜坐吟

冬夜夜寒覺夜長沉吟久坐坐北堂冰合井泉月入  
閨金釭青凝照悲啼金釭滅啼轉多掩妾淚聽君歌  
歌有聲妾有情情聲合兩無違一語不入意從君萬  
曲梁塵飛

野田黃雀行

遊莫逐炎洲翠棲莫近吳宮鷺吳宮火起焚爾窠炎

洲逐翠遭網羅蕭條兩翅蓬蒿下縱有鷹鷂奈若作  
爾何

筮篥謠續古詞亦曰引

攀天莫登龍走山莫騎虎貴賤結交心不移唯有嚴  
陵及光武周公稱大聖管蔡寧相容漢謠一斗粟不  
與淮南春兄弟尚路一作行路吾心安所從他人方寸間  
山海幾千重輕言託朋友對面九疑峯多花必早落  
桃李不如松管鮑久已死何人繼其蹤

雉朝飛一有

麥隴青青三月時白雉朝飛挾兩雌錦衣綺翼何離  
縱犢牧採薪感之悲春天和白日暖啄食飲泉勇氣

滿爭雄鬪死繡頸斷雉子班奏急管絃心傾美酒盡  
玉椀枯楊枯楊爾生萸我獨七十而孤棲彈絃寫恨  
意不盡瞑目歸黃泥

上雲樂

老胡文康詞或去范雲  
及周捨所作今疑之

金天之西白日所沒康老胡鷄生彼月窟巉巖容儀  
戍削風骨碧玉足一作雙目瞳黃金拳拳兩鬢紅一作髮  
華蓋垂下睫嵩岳臨上層不覩譎詭兒豈知造化神  
大道是文康之嚴父元氣乃文康之老親撫頂弄盤  
古推車轉天輪云見日月初生時鑄冶火精與水銀  
陽烏未出谷顧兔半藏身女媧戲黃土團作愚下人  
散在六合間濛濛若沙塵生死了不盡誰明此胡是

仙真西海栽若木東溟植扶桑別來幾多時枝葉萬  
里長中國有七聖半路頽鴻荒陛下應運起龍飛入  
咸陽赤眉立盆子白水興漢光叱咤四海動洪壽爲  
簸揚舉足蹋紫微天關自開張老胡感至德東來進  
仙倡五色師子九苞鳳皇是老胡鷄犬鳴舞飛帝鄉  
淋漓颯沓進退成行能胡歌獻漢酒跪雙膝並兩肘  
散花指天舉素手拜龍顏獻聖壽北斗戾南山摧天  
子九九八十一萬歲長傾萬歲一作年杯

夷則格上白鳩拂舞辭

鏗鳴鐘考卽鼓歌白鳩引拂舞白鳩之白誰與隣霜  
衣雪襟誠可珍舍哺七子能平均食不咽性爽一作可馴

首農政鳴陽春天子刻玉杖鏤形賜耆人白鷺一作鷺亦  
白非純真外潔其色心匪仁闕五德無司晨胡爲啄  
我葭下之紫鱗鷹鷗鷓鴣貪而好殺鳳皇雖大聖不  
願以爲臣

日出入行

日出東方隈似從地底來歷天又復入西海六龍所  
舍安在哉其始與終古不息一作其行終古不休息人非元氣安  
得與之乂徘徊草不謝榮於春風木不怨落於秋天  
誰揮鞭策驅四運萬物興歇皆自然羲和羲和汝奚  
汨沒於荒淫之波魯陽何德駐景揮戈逆道違天矯  
誣實多吾將囊括大塊浩然與溟濤同科

胡無人

嚴風吹霜海草凋筋幹精堅胡馬驕漢家戰士三十  
萬將軍兼領一作誰者霍嫖姚流星白羽罽間插劍花秋蓮  
光出匣天兵照雪下玉關虜箭如沙射金甲雲龍風  
虎盡一作畫交回太白入月敵可摧敵可摧旄頭滅履胡  
之腸涉胡血懸胡青天上埋胡紫塞旁胡無人漢道  
昌陛下之壽三千霜但歌大風雲飛揚安用猛士兮  
守四方

北風行

燭龍棲寒門光耀猶旦開日月照之何不及此一作日  
不及唯此有北風號怒天上來燕山雪花大如席片片吹

落軒轅臺幽州思婦十二月停歌罷笑雙蛾摧倚門  
望行人念君長城苦寒良可哀別時提劍救邊去遺  
此虎文金鞞韞中有一雙白羽箭蜘蛛結網生塵埃  
箭空在人今戰死不復回不忍見此物焚之已成一作  
灰黃河捧土尚可塞北風雨雪恨難裁一作

俠客行

趙客縵胡纓吳鉤霜雪明銀鞍照白馬颯沓如流星  
十步殺一人千里不留行事了拂衣去深藏身與名  
閑過信陵飲脫劍膝前一作上橫將炙啖朱亥持觴勸侯  
嬴三杯吐然諾五嶽倒為輕眼花耳熱後意氣素霓  
生救趙揮金槌鄴邯先震驚千秋二壯士烜赫大梁

城縱死俠骨香不慙世上英誰能書閣下白首太玄經

關山月

明月出天山蒼茫雲海間長風幾萬里吹度玉門關  
漢下白登道胡窺青海灣由來征戰地不見有人還  
戍客望邊色一作思歸多苦顏高樓當此夜歎息未應

閑一作還

李太白文集卷第三

吳門繆晷武子甫重刊宋本

李太白文集卷第四

歌詩四十首

樂府二

獨漉篇

獨漉水中泥水濁不見月不見月尚可水深行人沒  
越鳥從南來胡鴈亦北度我欲彎弓向天射惜其中  
道失歸路落葉別樹飄零隨風客無所託悲與此同  
羅帷舒卷似有人開明月直入無心可猜雄劍挂壁  
時時龍鳴不斷犀象蓋澁苔生國恥未雪何由成名  
神鷹夢澤不顧鳴鳶爲君一擊搏鵬九天

登高丘而望遠海

李四

登高丘望遠海六鼇骨已霜三山流安在扶桑半摧  
折白日沉光彩銀臺金闕如夢中秦皇漢武空相待  
精衛費木石鼃鼃無所憑君不見驪山茂陵盡灰滅  
牧羊之子來攀登盜賊劫寶玉精靈竟何能窮兵黷  
武今如此鼎湖飛龍安可乘

陽春歌

長安白日照春空綠楊結煙桑一作垂裊風披香殿前花  
始紅流芳發色繡戶中繡戶中相經過飛鸞皇后輕  
身舞紫宮夫人絕世歌聖君三萬六千日歲歲年年  
奈樂何

陽叛兒

君歌陽叛兒妾勸新豐酒何許最關人烏啼白門柳  
烏啼隱楊花君醉留妾家博山鑪中沉香火雙煙一  
氣凌紫霞

雙鸞離

雙鸞復雙鸞雙飛令人羨玉樓珠閣不獨棲金窻繡  
戶長相見栢梁失火去因入吳王宮吳宮又焚蕩鷓  
盡巢亦空憔悴一身在孀雌憶故雄雙飛難再得傷  
我寸心中

山人勸酒

蒼蒼雲松落落綺皓春風爾來爲阿誰胡蝶忽然滿  
芳草秀眉霜雪桃花貌青髓綠髮長美好稱是秦時

避世人勸酒相歡不知老各守兔麋一作廉志恥隨龍虎  
爭歛起佐一作太子漢皇乃復驚顧謂戚夫人彼翁羽  
翼成歸來商山下泛若雲無情舉觴酌巢由洗耳何  
獨一作清浩歌望嵩嶽意氣還一作遙相傾

于闐採花

于闐採花人自言花相似明妃一朝西入胡胡中美  
女多羞死乃知漢地多名姝胡中無花可方比丹青  
能令醜者妍無鹽醜在深宮裏自古妬娥眉胡沙埋  
皓齒

鞠歌行

玉不自言如桃李魚目笑之下和恥楚國青蠅何太

多連城白壁遭讒毀荆山長號泣血人忠臣死為刑  
足鬼聽曲知甯戚夷吾因小妻秦穆五羊皮買死百  
里奚洗拂青雲上當時賤如泥朝歌鼓刀叟虎變蟠  
溪中一舉釣六合遂荒營丘東平生渭水曲誰識一作  
此老翁奈何今之人雙目送飛鴻

幽澗泉

拂彼白石彈吾素琴幽澗漱兮流泉深善手明徽高  
張清心寂歷似千古松颺颺兮萬尋中見愁緩吊影  
而危處兮叫秋木而長吟客有哀時失志而聽者淚  
淋浪以沾襟乃緝商綴羽潺湲成音吾但寫聲發憤  
於妙指殊不知此曲之古今幽澗泉鳴深林

王昭君二首一作昭君怨

漢家秦地月流影照一作送明妃一上玉關道天涯去不歸漢月還從東海一作方出明妃西嫁無來日燕支長寒雪作花娥眉憔悴沒胡沙生乏黃金枉圖畫死留青塚使人嗟

昭君拂玉鞍上馬啼紅頰今日漢宮人明朝胡地妾

中山孺子妾歌漢賜中山靖王贈孺子妾及夫史才人已下歌四篇

中山孺子妾特以色見珍雖不如延年妹亦是當時絕世人桃李出深井花豔驚上春一貴復一賤關天豈由身芙蓉老秋霜團扇羞網塵戚姬髡削入春市萬古共悲辛

荊州歌

白帝城邊足風波瞿塘五月誰敢過荊州麥熟繭成蛾繰絲憶君頭緒多撥穀飛鳴奈妾何

設辟邪伎鼓吹雉子班曲辭

辟邪伎作鼓吹鷩雉子班之奏曲成喔咿振迅欲飛鳴扇錦翼雄風生雙雌同飲啄矯悍誰能爭乍向草中耿介死不求黃金籠下生天地至廣大何惜遂物情善卷讓天子務光亦逃名所貴曠士懷朗然合太清

相逢行

相逢紅塵內高揖黃金鞭萬戶垂楊裏君家阿那邊

古有所思

我思仙一作佳人乃在碧海之東隅海寒多天風自波連  
山一作天倒蓬壺長鯨噴湧不可涉撫心茫茫淚如珠西  
來青鳥東飛去願寄一書謝麻姑

久別離

別來幾春未還家玉窻五見櫻桃花况有錦字書開  
緘使一作令人嗟此腸斷彼心絕雲鬢綠鬢罷攬結愁如  
回飈亂白雪去年寄書報陽臺今年寄書重相催胡  
為乎東風為我吹行雲使西來待來竟不來落花寂  
寂委青苔

採蓮曲

若耶溪傍採蓮女笑隔荷花共人語日照新粧水底  
明風飄香袖空中舉岸上誰家遊冶郎三三五五映  
垂楊紫騮嘶入落花去見此踟躕空斷腸

白頭吟

又一篇與此  
異今兩存

錦水東北流波蕩雙鴛鴦雄巢漢宮樹雌弄秦草芳  
寧同萬死碎綺翼不忍雲間兩分張此時阿嬌正嬌  
妬獨坐長門愁日暮但願君恩顧妾深豈惜黃金買  
詞賦相如作賦得黃金丈夫好新多異心一朝將聘  
茂陵女文君因贈一作賦白頭吟東流不作西歸水落花  
辭條著故林兔絲故無情隨風任傾倒誰使女蘿枝  
而來強縈抱兩草猶一心人心不如草莫卷龍鬚席

從他生網絲且留琥珀枕或有夢來時覆水再收豈  
滿杯棄妾已去難重回古時得意不相負祇今唯見  
青陵臺

錦水東流碧波蕩雙鴛鴦雄巢漢宮樹雌弄秦草芳  
相如去蜀謁武帝赤車駟馬生輝光一朝再覽大人  
作萬乘忽欲凌雲翔聞道阿嬌失恩寵千金買賦要  
君王相如不憶貧賤日官高金多聘私室茂陵姝子  
皆見求文君歡愛從此畢淚如雙泉水行墮紫羅襟  
五起雞三唱清晨白頭吟長吁不整綠雲鬢仰訴青  
天哀怨深城崩杞梁妻誰道士無心東流不作西歸  
水落花辭枝羞故林頭上玉鸞釵是妾嫁時物贈君

表相思羅袖幸時拂莫卷龍鬚席從他生網絲且留  
琥珀枕還有夢來時鸚鵡裘在錦屏上自君一挂無  
由一作披妾有秦樓鏡照心勝照井願持照新人雙對  
可憐影覆水却收不滿杯相如還謝文君回古來得  
意不相負祇今唯見青陵臺

臨江王節士歌

洞庭白波木葉稀燕鴈始入吳雲飛吳雲寒燕鴈苦  
風號沙宿瀟湘浦節士感秋淚如雨白日當天心照  
之可以事明主壯士一作氣憤雄一作寒風生安得倚天劍跨  
海斬長鯨

司馬將軍歌 代隴上健兒陳安

狂風吹古月竊弄章華臺北落明星動光彩南征猛  
將如雲雷一作南方有事將軍來手中電曳一作電倚天劍直斬長鯨  
海水開我見樓船壯心目頗似龍驤下三蜀揚兵習  
戰張虎旗江中白浪如銀屋身居玉帳臨河魁紫髯  
若戟冠崔嵬細柳開營揖天子始知霸上為嬰孩羌  
笛橫吹阿鞬回向月樓中吹落梅將軍自起舞長劍  
壯士呼聲動九垓功成獻凱見明主丹青畫像麒麟  
臺

君道曲

梁之雅歌有五篇今作一章

大君若天覆廣運無不至軒后爪牙常先太山稽如  
心之使臂小白鴻翼於夷吾劉葛魚水本無二土扶

可成牆積德為厚地

結襪子

燕南壯士吳門豪筑中置鈔魚隱刀感君恩重許君  
命太山一擲輕鴻毛

結客少年場行

紫鷲黃金瞳啾啾一作稜稜搖綠髮平明相馳逐結客洛門  
東少年學劍術凌轢白猿公珠袍曳錦帶匕首插吳  
鴻由來萬夫勇挾此英雄風託交從劇孟買醉入新  
豐笑盡一杯酒殺人都市中羞道易水寒從一作徒令日  
貫虹燕丹事不立虛沒秦帝宮武陽死灰人安可與  
成功

長干行二首

妾髮初覆額折花門前劇郎騎竹馬來遶牀弄青梅  
同居長干里兩小無嫌猜十四為君婦羞顏未嘗開  
低頭向暗壁千喚不一回十五始展眉願同塵與灰  
常存抱柱信一作上望夫臺十六君遠行瞿塘滪預  
堆五月不可觸猿聲天上哀門前遲一作行跡一一生  
綠一作蒼苔苔深不能掃落葉秋風早八月蝴蝶來一作雙  
飛西園草感此傷妾心坐愁紅顏老早晚下三巴預  
將書報家相迎不道遠直至長風沙  
憶妾一作昔深閨裏煙塵不曾識嫁與長干人沙頭候風  
色五月南風興思君下巴陵八月西風起想君發揚

子去來悲如何見少別離多湘潭幾日到妾夢越風  
波昨夜狂風度吹折江頭樹森森暗無邊行人在何  
處北客至一作王公朱衣滿汀一作中一作客一作浮雲  
來投宿數朝不肯東自憐十五餘顏色桃李紅那作  
商人婦愁水復愁風

古朗月行

小時不識月呼作白玉盤又疑瑤臺鏡飛在青雲端  
仙人垂兩足桂樹作一作團圓白兔擣藥成問言與誰  
食蟾蜍蝕圓影天一作明夜已殘羿昔落九烏天人清  
且安陰精此淪惑去去不足觀憂來其如何惻愴摧  
心肝

上之回

三十六離宮樓臺與天通閣道步行月美人愁煙空  
恩踈寵不及桃李傷春風淫樂意何極金輿向回中  
萬乘出黃道千旗揚彩虹前軍細柳北後騎甘泉東  
豈問渭川老寧邀襄野童但慕一作秋暮瑶池宴歸來樂未  
窮

獨不見

白馬誰家子黃龍邊塞兒天山三丈雪豈是遠行時  
春蕙忽秋草莎雞鳴曲池風催寒梭響月入霜閨悲  
憶與君別年種桃齊娥眉桃今百餘尺花落成枯枝  
終然獨不見流淚空自知

白紵辭三首

揚清歌

一作音

發皓齒北方佳人東鄰子且吟白紵停綠

水長袖拂面爲君起寒雲夜卷霜海空胡風吹天飄

塞鴻玉顏滿堂樂未終

館娃日落歌吹深月寒江清夜沉沉美人一笑千黃

金垂羅舞榭揚哀音郢中白雪且莫吟子夜吳歌動

君心動君心冀君賞願作天池雙鴛鴦一朝飛去青

雲上

吳刀剪綵一作緜縫舞衣明粧麗服奪春輝揚眉轉袖若

雪飛傾城獨立世所稀激楚結風醉忘歸高堂月落

燭已微玉釵挂纓君莫違

鳴鴈行

胡鴈鳴辭燕山昨發委羽朝度關一銜蘆枝南飛  
散落天地間連行接翼往復還客居煙波寄湘吳凌  
霜觸雪毛體枯畏逢矰繳鷲相呼聞弦虛墜良可吁  
君更彈射何為乎

妾薄命

漢帝重一作寵阿嬌貯之黃金屋咳唾落九天隨風生珠  
玉寵極愛還歇妬深情却踈長門一步地不肯暫回  
車雨落不上天水覆重難收一作難重收君情一作思與妾意各  
自東西流昔日芙蓉花今成斷根草一作素秋草以色事他  
人能得幾時好

幽州胡馬客歌

幽州胡馬客綠眼虎皮冠笑拂兩隻箭萬人不可干  
彎弓若轉月白鴈落雲端雙雙掉鞭行遊獵向樓蘭  
出門不顧後報國死何難天驕五單于狼戾好兇殘  
牛馬散北海割鮮若虎食雖居燕支山不道朔雪寒  
婦女馬上笑顏如頰玉盤翻飛射鳥獸花月醉雕鞍  
旄頭四光芒爭戰如蜂攢白刃灑赤血流沙為之丹  
名將古誰是疲兵良可歎何時天狼滅父子得閑安

門有車馬客行

門有車馬賓一作客金鞍曜朱輪謂從丹一作雲霄落乃是故  
鄉親呼兒掃中堂坐客論悲辛對酒兩不飲停觴淚

盈巾歎我萬里遊飄飄三十春空談霸王略紫綬不  
挂身雄劍藏玉匣陰符生素塵廓落無所合流離相  
水濱借問宗黨間多為泉下人生苦百戰役死託萬  
鬼鄰北風揚胡沙埋翳周與秦大運且如此蒼穹寧  
匪仁惻愴竟何道存亡任大鈞

君子有所思行

紫閣連終南青冥天倪色憑崖望咸陽宮闕羅地極  
萬井驚盡出九衢如絃直渭水清銀河橫天流不息  
朝野盛文物衣冠何翕施廢馬散連山軍容威絕域  
伊臯運元化衛霍輸筋力歌鐘樂未休榮去老還逼  
圓光過滿缺太陽移中昃不散東海金何爭西輝匿

無作牛山悲惻愴淚沾臆

東海有勇婦

代關中有貞女又作賢

梁山感祀妻慟哭為之傾金石忽暫開都由激深情  
東海有勇婦何慙蘇子卿學劍越處子超騰若流星  
捐軀報夫讎萬死不顧生白刃曜素雪蒼天感精誠  
十步兩躡一作跳躍三呼一作交兵斬首掉國門蹴踏五藏  
行豁此伉儷憤粲然大義明北海李史君飛章奏天  
庭捨罪警風俗流芳播滄瀛志在列女籍竹帛已光  
榮淳于免詔獄漢主為緹縈津妾一棹歌脫父於嚴  
刑十子若不肖不如一女英豫讓斬空衣有心竟無  
成要離殺慶忌壯夫素所輕妻子亦何辜焚之買虛

聲豈如東海婦事立獨揚名

黃葛篇

黃葛生洛溪黃花自絲罽青煙蔓長條繚繞幾百尺  
閨人費素手採緝作絺絰縫為絕國衣遠寄日南客  
蒼梧大火落暑服莫輕擲此物雖過時是妾手中跡

李太白文集卷第四

吳門繆晷武子甫重刊宋本

李太白文集卷第五

歌詩五十六首

樂府三

白馬篇

龍馬花雪毛金鞍五陵豪秋霜切玉劍落日明珠袍  
鬪雞事萬乘軒蓋一何高弓摧宜山虎手接太山猱  
酒後競風彩三杯弄寶刀殺人如剪草劇孟同遊遨  
發憤去函谷從軍向臨洮叱咤經百戰一作萬戰場匈奴盡  
波濤一作逃歸來使酒氣未肯拜一作下蕭曹羞入原憲室荒  
徑隱蓬蒿

鳳笙篇

仙人十五愛吹笙學得崑丘彩鳳鳴始聞鍊氣食金  
液復道朝天赴玉京玉京迢迢幾千里鳳笙去去無  
窮已欲歎離聲發絳脣更嗒別調流纖指此時惜別  
詎堪聞此地相看未忍分重吟真曲和清吹却奏仙  
歌響綠雲綠雲紫氣向函關訪道應尋緱氏山莫學  
吹笙王子晉一遇浮丘斷不還

怨歌行

一作長安見內人出  
嫁令子代為怨歌行

十五入漢宮花顏笑一作如春紅君王選玉色侍寢金一作錦

屏中薦枕嬌夕月卷衣戀春一作香風寧知趙飛鸞奪寵

恨無窮沉憂能傷人綠鬢成霜蓬一朝不得意世事

徒一作信為空鷓鴣換美酒舞衣罷雕龍寒苦不忍言為

君奏絲桐腸斷絃亦絕悲心夜忡忡

塞下曲六首

五月天山雪無花祇有寒笛中間折柳春色未曾看  
曉戰隨金鼓宵眠抱玉鞍願將畧下劔直為斬樓蘭  
天兵下北荒胡馬欲南飲橫戈從百戰直為銜恩甚  
握雪海上飡拂沙隴頭寢何當破月氏然後方高枕  
駿馬如風颺鳴鞭出渭橋彎弓辭漢月插羽破天驕  
陣解星芒盡營空海霧銷功成畫麟閣獨有霍嫖姚  
白馬黃金塞雲砂繞夢思那堪愁苦節遠憶邊城兒  
螢飛秋牕滿月度霜闈遲摧殘梧桐葉蕭颯沙棠枝  
無時獨不見淚流空自知

塞虜乘秋下天兵出漢家將軍分虎竹戰士卧龍沙  
邊月隨弓影胡霜拂劍花玉關殊未入少婦莫長嗔  
烽火動沙漠連照甘泉雲漢皇按劍起還召李將軍  
兵一作殺氣天上合鼓聲隨底聞橫行負勇氣一戰靜妖  
氛

來日大難

來日一身攜糧負薪道長食盡苦口焦脣今日醉飽  
樂過千春仙人相存誘我遠學海陵三山陸慙五嶽  
乘龍上三天飛目瞻兩角授以神藥金丹滿握螭蛄  
蒙恩深愧短促思填東海強銜一木道重天地軒師  
廣成蟬翼九五以求長生下士大笑如蒼蠅聲

塞上曲

大漢無中策匈奴犯渭橋五原秋草綠胡馬一何驕  
命將征西極橫行陰山側燕支落漢家婦女無花色  
轉戰渡黃河休兵樂事多蕭條清萬里瀚海寂無波

玉階怨

玉階生白露夜久侵羅襪却下水精簾  
朧望秋月

襄陽曲四首

襄陽行樂處歌舞白銅鞮江城回渌水花月使人迷  
山公醉酒時酩酊襄一作高陽下頭上白接籬  
倒著還騎

馬

峴山臨漢江水渌沙如雪一作水色如霜雪上有墮淚碑青苔

久磨滅

且醉習家池莫看墮淚碑山公欲上馬笑殺襄陽兒

大堤曲

漢水臨一作橫襄陽花開大堤暖佳期大堤下淚向南雲

滿春風復無情吹我夢魂散不見眼中人天長音信

斷

宮中行樂詞八首

奉詔作五言

小小生金屋盈盈在紫微山花插寶髻石竹繡羅衣

每出深宮裏常隨步輦歸只愁歌舞散一作罷化作綵雲

飛

柳色黃金嫩梨花白雪香玉樓巢一作關翡翠珠一作金殿鎖

鴛鴦選妓隨雕一作朝輦徵歌出洞房宮中誰第一飛鸞

在昭陽

盧橘為秦樹蒲桃出一作是漢宮煙花宜落日絲管醉春

風笛奏龍鳴一作吟水簫吟一作鳴鳳下空君王多樂事何必

向一作在回中一作還與萬方同

玉樹一作殿春歸日一作好金宮樂事多後庭朝未入輕輦夜

相過笑出花間語嬌來燭下歌莫教明月去留著醉

姮娥

繡戶香風暖紗牕曙色新宮花爭笑日池草暗生春

綠樹聞歌鳥青樓見舞人昭陽桃李月羅綺自一作坐相

親

今日明光裏還須結伴遊春風開紫殿天樂下珠樓  
豔舞全知巧嬌歌半欲羞更憐花月夜宮女笑藏鉤  
寒雪梅中盡春風柳上歸宮鶯嬌欲醉簷鶯語還飛  
遲日明歌席新花豔舞衣晚來移綵仗行樂好光輝  
水淥南薰殿花紅北闕樓鶯歌聞太液鳳吹遶瀛洲  
素女鳴珠佩天人弄綵毬今朝風日好宜入未央遊  
清平調詞三首  
雲想衣裳花想容春風拂檻露華濃若非羣玉山頭  
見會向瑤臺月下逢  
一枝紅豔露凝香雲雨巫山枉斷腸借問漢宮誰得  
似可憐飛鷺倚新粧

名花傾國兩相歡長得君王帶笑看解釋春風無限  
恨沉香亭北倚闌干

鼓吹入朝曲

金陵控海浦淥水帶吳京饒歌列騎吹颯沓引公卿  
槌鐘速嚴粧伐鼓啓重城天子憑玉案劔履若雲行  
日出照萬戶簪裾爛明星朝罷沐浴閑遨遊闈風亭  
濟濟雙闕下歡娛樂恩榮

秦女休行

古詞魏朝協律都尉  
延年所作今擬之

西門秦氏女秀色如瓊花手揮白楊刀清晝殺讎家  
羅袖灑赤血英聲凌紫霞直上西山去關吏相邀遮  
壻為燕國王身被詔獄加犯刑若履虎不畏落爪牙

素頸未及斷摧眉伏泥沙金雞忽放赦大辟得寬賒  
何慙聶政姊萬古共驚嗟

秦女卷衣

天子居未央妾來卷衣裳顧無紫宮寵敢拂黃金牀  
水至亦不去態來尚可當微身捧日月飄若螢火光  
願君採葑菲無以下體妨

東武吟

一作懷留別翰林諸公

好古笑流俗素聞賢達風方希佐明主長揖辭成功  
白日在高天回光燭微躬恭承鳳凰詔欵起雲蘿中  
清切紫霄迴優遊丹禁通君王賜顏色聲價凌煙虹  
乘輿擁翠蓋扈從金城東寶馬麗絕景錦衣入新豐

倚巘望松雪對酒鳴絲桐因學揚子雲獻賦甘泉宮  
天書美片善清芬播無窮歸來入咸陽談笑皆王公  
一朝去金馬飄落成飛蓬賓友日踈散玉樽亦已空  
才力猶可倚一作時不慙世上雄閑作東武吟曲盡情未  
終書此謝知己吾尋黃綺翁一作扁舟尋釣翁

邯鄲才人嫁為廝養卒婦

妾本叢臺女揚娥入丹闕自倚顏如花寧知有凋歇  
一辭玉階下去若朝雲沒每憶邯鄲城深宮夢秋月  
君王不可見惆悵至明發

出自薊北門行

虜陣橫北荒胡星曜精芒羽書速驚電烽火晝連光

虎竹救邊急戎車森已行明主不安席按劍心飛揚  
推轂出猛將連旗登戰場兵威衝絕漠殺氣凌穹蒼  
列卒一作陣赤山下開營紫塞傍孟冬風沙緊旌旗一作旆颯  
凋傷盡角悲海月征衣卷天霜揮刃斬樓蘭彎弓射  
賢王單于一平蕩種落自奔亡收功報天子行歌一作歌舞  
歸咸陽

洛陽陌

白玉誰家郎回車渡天津看花東陌上驚動洛陽人

北上行

北上何所苦北上緣太行磴道盤且峻巉巖凌穹蒼  
蒼馬足蹶側石車輪摧高崗沙塵接幽州烽火連朔方

殺氣毒劍戟嚴風裂衣裳奔鯨夾黃河鑿齒屯洛陽  
前行無歸日返顧思舊鄉慘戚冰雪裏悲號絕中腸  
尺布不掩體皮膚劇枯桑汲水澗谷阻採薪壠坂長  
猛虎又掉尾磨牙皓秋霜草木不可食飢飲零露漿  
歎此北上苦停驂為之傷何日王道平開顏覩天光

短歌行

白日何短短百年苦易滿蒼穹浩茫茫萬劫太極長  
麻姑垂兩鬢一半已成霜天公見玉女大笑億千場  
吾欲攬六龍回車挂扶桑北斗酌美酒勸龍各一觴  
富貴非所願為一作與人駐顏一作顏光

空城雀

嗷嗷空城雀身計何戚促本與鷓鴣羣不隨鳳凰族  
提攜四黃口飲乳未嘗足食君糠粃餘常恐烏鳶逐  
恥涉太行險羞營覆車粟天命有定端守分絕所欲

發白馬

將軍發白馬旌節渡黃河簫鼓聒川嶽滄溟湧濤一作洪  
波武安有震瓦易水無寒歌鐵騎若雪山飲流涸滹  
沱揚兵獵月窟轉戰略朝那倚劍登燕然邊烽列峽  
峨蕭條萬里外耕作五原多一掃清大漠包虎戢金  
戈

陌上桑

美女渭橋東

一作美女細綺衣又作遊女

春還

一作還來

事蠶作五馬飛如

花一作如花飛龍又作如飛龍青絲結金絡不知誰家子調笑來相謔  
妾本秦羅敷玉顏豔名都綠條映素手採桑向城隅  
使君且不顧况復論秋胡寒蠶愛碧草鳴鳳棲青梧  
託心自有處但怪旁人愚徒令白日暮高駕空踟躕

枯魚過河泣

白龍改常服偶被豫且制誰使爾為魚徒為訴天帝  
作書報鯨鯢勿恃風濤勢濤落歸泥沙翻遭螻蟻噬  
萬乘慎出入柏人以為誠識作

丁都護督護歌

雲陽上征去兩岸饒商賈吳牛喘月時拖舩一何苦  
水濁不可飲壺漿半成土一唱都護歌心摧淚如雨

萬人繫盤石無由達江滸君看石芒碭掩淚悲千古

相逢行 一六有贈

朝騎五花馬謁帝出銀臺秀色誰家子雲車一作珠箔

開金鞭遙指點玉勒近遲回夾轂相借問疑一作知從天

上來一本更添憐腸愁欲斷斜日復梅邀入青綺門當歌

共銜盃一作嬌羞初解銜杯映歌扇似月雲中見相

見不得一作相親不如不相見相見情已深未語可知

心胡為守空閨孤眠愁錦衾錦衾與羅帷纏綿會有

時春風正澹蕩暮雨來何遲一作春風正糾願因三

青鳥更報長相思光景不待人須臾髮成絲當年失

行樂老去徒傷悲持此道密意無令曠佳期

千里思 一作千里曲

李陵沒胡沙蘇武還漢家迢迢五原關朔雪亂邊花

一作愁見一去隔絕國思歸但長嗟鴻鴈向西北因

飛一作書報天涯

樹中草

鳥銜野田草誤入枯桑裏客土植危根逢春猶不死

草木雖無情因依尚可生如何同枝葉各自有枯榮

君馬黃

君馬黃我馬白馬色雖不同人心本無隔共作遊冶

盤雙行洛陽陌長劍既照曜高冠何絕赫各有千金

裘俱為五侯客猛虎落陷穽壯夫時屈厄相知在急

難獨好亦一作何益

擬古

融融白玉輝映我青蛾眉寶鏡似空水落花如風吹  
出門望同子蕩漾不可期安得黃鶴羽一報佳人知

折楊柳

垂楊一作楊柳拂渌水搖豔一作豔東風年花明玉關雪葉暖金

窻煙美人結長想對此心悽然攀條折春色遠寄龍

庭前一作龍沙邊

鳳凰曲

羸女吹玉簫吟弄天上春青鸞不獨去更有攜手人  
影滅綵雲斷遺聲落西秦

少年子

青雲少年子挾彈章臺左鞍馬四邊開突如流星過  
金丸落飛鳥夜入瓊樓卧夷齊是何人獨守西山餓

紫騮馬

紫騮行一作騮且嘶雙翻碧玉蹄臨流不肯渡似惜錦障

泥白雪關山一作城遠黃雲海戍迷揮鞭萬里去安一作得

念一作戀春閨

少年行二首後一首亦作小放歌行

擊筑飲美酒劒歌易水湄經過燕太子結託并州兒  
少年負壯氣奮烈自有時因聲魯勾踐爭情一作博勿

相欺

五陵年少金市東銀鞍白馬度春風落花踏盡遊何處笑入胡姬酒肆中

白鼻騮

銀一作金鞍白鼻騮綠地障泥錦細雨春風花落時一作春風細雨時落花揮鞭直就胡姬飲

豫章行

胡風吹代馬一作燕入北擁魯陽關吳兵照海雪西討何時還半渡上遼津黃雲慘無顏老母與子別呼天野草間白馬一作鳥繞旌旗悲鳴相追攀白楊秋月苦早落豫章山本為休明人斬虜素不閑豈惜戰鬪死為君掃兇頑精感石没羽豈云憚險艱樓船若鯨飛

波蕩落星灣此曲不可奏三軍鬚成班

沐浴子

沐芳莫彈冠浴蘭莫振衣處世忌太潔志一作至人貴藏暉滄浪有釣叟吾與爾同歸

李太白文集卷第五

吳門繆昆武子甫重刊宋本





个  
五